



**აფხაზეთის ავტონომიური რესპუბლიკის მთავრობის**  
**Аԥснытәи Автономиятәи Ареспублика Аиҭабыра Аусбартәтәи Аԥцара**  
**დადგენილება**

**№3 2026 წლის 30 იანვარი ქ. თბილისი**

**ჟიული შარტავას სახელობის სტიპენდიის დაწესებისა და სტიპენდიის დანიშვნის თაობაზე**

**მუხლი 1**

„აფხაზეთის ავტონომიური რესპუბლიკის მთავრობის სტრუქტურის, უფლებამოსილებისა და საქმიანობის წესის შესახებ“ აფხაზეთის ავტონომიური რესპუბლიკის კანონის მე-6 მუხლის შესაბამისად:

1. დაწესდეს ჟიული შარტავას სახელობის სტიპენდია (გარდა პოლიტიკის მეცნიერების დარგში) განსაკუთრებული მიღწევებითა და წარმატებებით წარმოჩენილი აფხაზეთის თემაზე მომუშავე ბაკალავრიატისა და მაგისტრატურის სტუდენტებისათვის და დამტკიცდეს ჟიული შარტავას სახელობის სტიპენდიის დანიშვნის წესი თანდართული დანართის შესაბამისად.

**მუხლი 2**

აფხაზეთის ავტონომიური რესპუბლიკის ფინანსთა და ეკონომიკის სამინისტრომ უზრუნველყოს წინამდებარე დადგენილებით დამტკიცებული წესით განსაზღვრული სახსრების გათვალისწინება „აფხაზეთის ავტონომიური რესპუბლიკის 2026 წლის რესპუბლიკური ბიუჯეტის შესახებ“ აფხაზეთის ავტონომიური რესპუბლიკის კანონში.

**მუხლი 3**

დადგენილება ძალაშია გამოქვეყნებისთანავე.

აფხაზეთის ავტონომიური რესპუბლიკის  
მთავრობის თავმჯდომარე

გიორგი ჯინჭარაძე



## ქიული შარტავას სახელობის სტიპენდიის დანიშვნის წესი

### მუხლი 1. ზოგადი დებულებანი

1. ქიული შარტავას სახელობის სტიპენდიის დანიშვნის წესი (შემდეგში - წესი) განსაზღვრავს აფხაზეთის თემაზე მომუშავე (გარდა პოლიტიკის მეცნიერების დარგში) განსაკუთრებული მიღწევებითა და წარმატებებით წარმოჩენილი ბაკალავრიატისა და მაგისტრატურის სტუდენტებისათვის ქიული შარტავას სახელობის სტიპენდიის (შემდეგში სტიპენდია) დანიშვნის პირობებსა და პროცედურებს.
2. სტიპენდია გამიზნულია ამ მუხლის პირველი პუნქტით გათვალისწინებული ბაკალავრიატისა და მაგისტრატურის აკრედიტებული უმაღლესი საგანმანათლებლო პროგრამის იმ სტუდენტებისათვის, რომლებსაც აქვთ 90% და მეტი აკადემიური მოსწრება, მონაწილეობდნენ სტუდენტურ კონფერენციებში, გამოქვეყნებული აქვთ საკონფერენციო ნაშრომი და არიან საზოგადოებრივად აქტიურები.

### მუხლი 2. სტიპენდია

1. ქიული შარტავას სახელობის სტიპენდია (შემდეგში - სტიპენდია) გამიზნულია აფხაზეთის თემაზე მომუშავე (გარდა პოლიტიკის მეცნიერების დარგში) განსაკუთრებული მიღწევებითა და წარმატებებით წარმოჩენილი ბაკალავრიატისა და მაგისტრატურის სტუდენტებს (შემდეგში - სტუდენტი) ინტელექტუალური პოტენციალის განვითარებისათვის.
2. სტიპენდია ინიშნება ბაკალავრიატის სტუდენტისათვის თვეში 300 ლარის ოდენობით არაუმეტეს 1 სტუდენტისა, ასევე მაგისტრატურის სტუდენტისათვის თვეში 300 ლარის ოდენობით არაუმეტეს 1 სტუდენტისა. სტიპენდიატებს სტიპენდია ეძლევათ დანიშვნის დღიდან ყოველთვიურად ერთი სასწავლო წლის განმავლობაში (ათი თვე).
3. სტიპენდიის დანიშვნის ღონისძიებათა უზრუნველყოფის, კონკურსის გამოცხადების, განაცხადების მიღების, კანდიდატთა განხილვისა და სტიპენდიატის გამოვლენის მიზნით აფხაზეთის ავტონომიური რესპუბლიკის განათლებისა და კულტურის სამინისტროში (შემდეგში - სამინისტრო) იქმნება კომისია.

### მუხლი 3. კომისია

1. კონკურსის ჩატარების უზრუნველსაყოფად და სტიპენდიატის გამოსავლენად შექმნილი კომისიის საქმიანობას ხელმძღვანელობს კომისიის თავმჯდომარე.
2. კომისიას 7 (შვიდი) წევრის შემადგენლობით, ყოველი სასწავლო წლის დასრულების, შემდეგ ამტკიცებს აფხაზეთის ავტონომიური რესპუბლიკის განათლებისა და კულტურის მინისტრი (შემდეგში - მინისტრი).
3. საჭიროების შემთხვევაში, კომისიის პერსონალურ შემადგენლობაში ცვლილებები შეაქვს მინისტრს.

4. ამ მუხლის მე-2 პუნქტის შესაბამისად დამტკიცებული კომისიის შემადგენლობა საქმიანობას წვეტს, ამ წესის შესაბამისად, სტიპენდიატის გამოვლენის შემდეგ.
5. კომისიის წევრთა საქმიანობა არ ანაზღაურდება.
6. კომისია მასზე დაკისრებული მოვალეობის შესრულებისათვის ანგარიშვალდებულია მინისტრის წინაშე.

#### მუხლი 4. კომისიის მუშაობის და სტიპენდიის დანიშვნის წესი

1. სტუდენტის წარდგენის უფლება აქვს აკრედიტებული უმაღლესი საგანმანათლებლო პროგრამების განმახორციელებელ ავტორიზებულ უმაღლეს საგანმანათლებლო დაწესებულებებს, სამინისტროს მხრიდან სტიპენდიის დასანიშნად კონკურსის გამოცხადების შესახებ ინფორმაციის მიწოდების შემდგომ.
2. ავტორიზებულმა უმაღლესმა საგანმანათლებლო დაწესებულებებმა უნდა წარმოადგინონ:
  - ა) უმაღლესი საგანმანათლებლო დაწესებულების წარდგინება;
  - ბ) რეკომენდაცია წარდგენილ კანდიდატზე;
  - გ) სტუდენტის სასწავლო ბარათი;
  - დ) სტუდენტის საკონფერენციო ნაშრომი;
  - ე) სტუდენტის საკონფერენციო ნაშრომის გამოქვეყნების, სტუდენტურ კონფერენციებში მონაწილეობის დამადასტურებელი დოკუმენტაცია;
  - ვ) სიგელები, სერთიფიკატები;
  - ზ) პირადობის დამადასტურებელი მოწმობის ასლი;
  - თ) კანდიდატის რეზიუმე (ინფორმაცია საზოგადოებრივი აქტივობების შესახებ).
3. განაცხადების წარდგენის ვადას განსაზღვრავს და საჯაროდ აცხადებს სამინისტრო სასწავლო წლის დასრულების შემდეგ.
4. გამოცხადებული ვადის გასვლის შემდეგ წარდგენილი განაცხადები არ განიხილება.
5. სტიპენდიის თაობაზე განაცხადებას კომისია განიხილავს ახალი სასწავლო წლის დადგომამდე და გადაწყვეტილებას იღებს ფარული კენჭისყრით.
6. კომისიის სხდომა უფლებამოსილია გამოიტანოს გადაწყვეტილება სტიპენდიის დანიშვნის შესახებ, თუ სხდომას ესწრება კომისიის წევრთა ნახევარზე მეტი.
7. სტიპენდიის მოსაპოვებლად კანდიდატის განხილვა მიმდინარეობს ღია წესით.
8. კომისიის წევრს უფლება აქვს მოითხოვოს სხდომაზე კანდიდატის დასწრება ან დამატებითი ინფორმაციის მიღება.
9. კომისია სტიპენდიის დანიშვნის თაობაზე გადაწყვეტილებას იღებს დამსწრე წევრთა ხმების უმრავლესობით, ფარული კენჭისყრით. ხმათა თანაბარი რაოდენობის შემთხვევაში გამამწყვეტია კომისიის თავმჯდომარის ხმა. სხდომაზე მიღებული გადაწყვეტილება ფორმდება შესაბამისი ოქმით.
10. კომისიის მიერ სტიპენდიის დანიშვნის შესახებ გადაწყვეტილების მიღების შემდეგ სხდომის ოქმი წარედგინება მინისტრს.
11. სტიპენდიის დანიშვნა ხორციელდება მინისტრის ბრძანებით.
12. სტიპენდიატს გადაეცემა დიპლომი.
13. მინისტრს უფლება აქვს სტიპენდიატს ვადაზე ადრე მოუხსნას სტიპენდია, თუკი სტუდენტს სტატუსი შეუჩერდება ან შეუწყდება. მინისტრი ამ გადაწყვეტილებას იღებს სტიპენდიაზე წარმდგენი საგანმანათლებლო დაწესებულების მიერ შესაბამისი ინფორმაციის მიწოდების შემდეგ.

## განმარტებითი ბარათი

**„ქიული შარტავას სახელობის სტიპენდიის დაწესებისა და სტიპენდიის დანიშვნის თაობაზე, აფხაზეთის ავტონომიური რესპუბლიკის მთავრობის დადგენილების პროექტზე**

დადგენილების პროექტი მომზადებულია „ნორმატიული აქტების შესახებ“ საქართველოს ორგანული კანონის მე-20 მუხლის მე-4 პუნქტისა და „ნორმატიული აქტების შესახებ“ აფხაზეთის ავტონომიური რესპუბლიკის კანონის მე-18 მუხლის მე-3 პუნქტის შესაბამისად.

წარმოდგენილი პროექტით უმაღლესი საგანმანათლებლო პროგრამების განმახორციელებელი ავტორიზებული უმაღლესი საგანმანათლებლო დაწესებულებების ბაკალავრიატისა და მაგისტრატურის სტუდენტებისათვის წახალისების უზრუნველყოფად მათი შემოქმედებითი და სასწავლო მოტივაციის გაზრდის მიზნით, ყალიბდება „ქიული შარტავას სახელობის სტიპენდია და მტკიცდება სტიპენდიის დანიშვნის წესი.

ეს წესი განსაზღვრავს აფხაზეთის თემაზე მომუშავე (გარდა პოლიტიკის მეცნიერების დარგში) განსაკუთრებული მიღწევებითა და წარმატებებით წარმოჩენილი ბაკალავრიატისა და მაგისტრატურის სტუდენტებისათვის ქიული შარტავას სახელობის სტიპენდიის დანიშვნის პირობებსა და პროცედურებს.

სტიპენდია გამიზნულია იმ ბაკალავრიატისა და მაგისტრატურის აკრედიტებული უმაღლესი საგანმანათლებლო პროგრამის სტუდენტებისათვის, რომლებსაც აქვთ 90% და მეტი აკადემიური

მოსწრება, მონაწილეობდნენ სტუდენტურ კონფერენციებში, გამოქვეყნებული აქვთ საკონფერენციო ნაშრომი და არიან საზოგადოებრივად აქტიურები.

### **დადგენილების პროექტის მიზანი**

პროექტის მიზანია უმაღლესი საგანმანათლებლო პროგრამების განმახორციელებელი ავტორიზებული უმაღლესი საგანმანათლებლო დაწესებულებების ბაკალავრიატისა და მაგისტრატურის სტუდენტებისათვის წახალისების უზრუნველყოფა მათი შემოქმედებითი და სასწავლო მოტივაციის გაზრდის მიზნით.

### **დადგენილების პროექტის ზეგავლენის შეფასება ბავშვის უფლებრივ მდგომარეობაზე**

დადგენილების პროექტის მიღება არ იწვევს ზეგავლენას ბავშვის უფლებრივ მდგომარეობაზე.

### **დადგენილების პროექტის ზეგავლენა ქალისა და მამაკაცის თანასწორობის მდგომარეობაზე**

ბრძანების პროექტი ქალისა და მამაკაცის თანასწორობის მდგომარეობაზე უარყოფით ზეგავლენას არ მოახდენს.

### **დადგენილების პროექტის მიღებით გამოწვეული საფინანსო-ეკონომიკური შედეგების გაანგარიშება**

პროექტი არ იწვევს დამატებით ფინანსურ ხარჯებს. პროექტი ხორციელდება აფხაზეთის ავტონომიური რესპუბლიკის რესპუბლიკური ბიუჯეტით დამტკიცებული ასიგნებების ფარგლებში.

### **პროექტის ინიციატორი და წარმდგენია**

აფხაზეთის ავტონომიური რესპუბლიკის განათლებისა და კულტურის სამინისტრო.